

Buku industri kayu dilancar

INDUSTRI pembalakan dan kayu-kayan memberikan pulangan lumayan terhadap ekonomi Malaysia dengan nilai pasaran eksport yang tinggi. Pada tahun lalu, nilai eksport balak dan produk seumpamanya memberi pulangan sebanyak 18.8 peratus. Nilai ini kemudiannya meningkat 6.5 peratus dengan RM22.14 bilion berbanding RM20.78 bilion pada tahun 2014.

Sejak pelaksanaan Pelan Induk Perindustrian pada tahun 80-an, pembalakan dan kayu-kayan bukan sahaja banyak menyumbang ke arah sosioekonomi, sebaliknya membuka lebih 190,000 peluang pekerjaan kepada penduduk negara ini.

Malah menurut data, sektor tersebut kekal sebagai penyumbang pendapatan tertinggi negara selepas petroleum dan minyak sawit.

Melihatkan kepentingan tersebut, Universiti Putra Malaysia (UPM) baru-baru ini mengadakan kerjasama dengan Majlis Kayu-Kayan, Kumai dan Tanggam Malaysia (MWMJC) menerbitkan sebuah buku berjudul *The Malaysian Timber Sector; Its Raw Material and Productivity Conundrum* dengan menghimpunkan segala maklumat berkaitan tentang

industri perkayuan di negara ini.

Penerbitan buku tersebut melakarkan sejarahnya tersendiri apabila menjadi penerbitan pertama dengan penglibatan hubungan dua hala antara industri dan universiti.

Isi kandungannya mengenangkan banyak maklumat penting daripada jurnal kajian Fakulti Perhutanan UPM dan mengambil masa selama dua tahun untuk disiapkan.

Selain itu, kandungan buku itu juga merangkumi 15 tahun data dan statistik daripada pelbagai agensi kerajaan yang akan memberi manfaat kepada pemain industri, pengubal dasar, ahli akademik, penganalisis dan pelajar universiti untuk pemahaman yang lebih baik.

Timbalan Menteri Perusahaan Perladangan dan Komoditi,

Datuk Datu Nasrun Datu Mansur

berkata, menyedari kepentingan sektor pembalakan terhadap ekonomi negara, kerajaan menerusi kementeriannya serta agensi-agensi di bawahnya akan terus melaksana langkah yang berkaitan untuk meningkatkan daya saing dan memastikan kemampuan industri balak dalam jangka masa yang panjang.

“Dalam konteks ini, isu

berkaitan bekalan bahan mentah, tenaga kerja, kepakaran bidang teknologi serta pembinaan modal insan tetap menjadi fokus inisiatif kerajaan demi meningkatkan produktiviti,” kata beliau.

Beliau menyatakan demikian ketika melancarkan buku tersebut di UPM baru-baru ini.

Pada majlis tersebut, beliau mewakili menterinya, Datuk Seri Mah Siew Keong.

Yang turut hadir Naib Canselor UPM, Prof. Datin Paduka Dr. Aini Ideris.

Katanya lagi, dengan perubahan landskap sektor pembalakan di seluruh dunia selepas kemunculan negara China dan Vietnam sebagai pengeluar utama di rantau Asia, penggiat industri sektor pembalakan di Malaysia tidak boleh berpuas hati dengan pencapaian semasa dan hanya bergantung kepada hasil bahan mentah dengan kos yang rendah semata-mata.

Justeru, keperluan nilai tambah dalam pengeluaran produk berdasarkan balak untuk bergerak seiring dengan rantaian nilai amat penting bagi meningkatkan produk bernilai tinggi yang akan diterjemahkan kepada keuntungan yang lebih besar.

DATU NASRUN DATU MANSUR (kanan) tertarik dengan inovasi berdasarkan kayu selepas melancarkan buku *The Malaysian Timber Sector: Its Raw Material and Productivity Conundrum* di Serdang, Selangor baru-baru ini. Turut sama, Dr. Aini Ideris (dua dari kiri).

